

тому их мудрому их ответу. И посла царь на Уептея шурина своего Хостоврула мурзу. И Хостоврул же пред царем похвалися, хотя Еупатия жива взяти и привести пред царя. Царь же послал с ним сильныя богатыри и воины татарския. Нападе на Еупатиево войско и хотя Еупатия жива взяти. И помолиться богу, и устремися, и исполни свою могучею силу, и выскакал против Хостоврула, и мечем разсече его до седла. И воинов его нача сещи без милости. Батыева сила прменяетъца, а Еупатиево войско не прменяетъся. Нещадно Батыевых воинов на полы пресекоша,<sup>а</sup> а иных до седла разсекоша и краеше на двое. Татарове же возбояшеса, виде Упатия крепко и силна. И наведоша на него пушки и многия наряды заряжены, и учели битися, и едва одолеша погании Еупатиево войско. И в той час убили Еупатия, и принесоша тело его пред царя Батыя. Послал по своих кнезей и мурз, и нача с ними дивитися на храбрость ево — Еупатия храбрости и месту резанскому — боец Еупатия с товарищи. Князи же и мурзы рекоша царю:<sup>б</sup> „Царю, мы на многих боях были и во многих землях были, а таких бойцов, и удалцов,<sup>в</sup> и ревецов не видали. И отцы наши не слышали про резанских бойцов, яко и здеса люди крыласты и безсмертны. Един человек с патью тысящею, а два со тмою“. Царь же Баты, зря на тело Еупатиево прослезися<sup>г</sup> и рече: „О колобрате Еупате, гараздо еси опочивал своею малою дружиною, да многих моих сильных богатырей побил, и многия мои полки побил. От тебя погибл. Аз есми многия орды побил, а никто против тебя не стал, а ты столько зла учинил. Аще ли бы у меня силнаго царя таков человек был, и тако бы послужил, и тако бы за меня стал, како ты государей своих стоял, и аз бы его имел аки брата роднова, и любил бы аки душу свою за такую предивную храбрость и богатырскую“. И поеха царь Батый во своясы. Богу слава.

### Редакция воинская. Вид I

*Текст по списку Публичн. библ. Погодинск. № 1606*

В лета 6745, во фторое лето по принесению образа великаго чюдотворца Николы. Приде безбожный царь Батый на Рускую землю и со множеством татары, и ста на реке на Воронеже близ Резанския земли. И присла послы бездельныя на Резань к великому князю Юрью Игоревичю Резанскому, просяще дисятины во всем: во князех и во всех людех его. И услыша то великий князь Юрьи Игоревичъ Резанский приход безбожнаго царя Батыя, и вьскоре посла во град Владимир ко благоверному и великому князю Георгию Всеволодичю Владимирскому, прося от него помощи, или сам пошел. Великий князь Георгий Всеволодовичъ Владимирский сам не пошел, ни на помощь не послал, хотя сам о себе

<sup>а</sup> В рук.: песекоша.

<sup>б</sup> В рук.: рю.

<sup>в</sup> В рук.: удалцо.

<sup>г</sup> Последнее слово вставлено на поле.